

AKASHVANI AIZAWL

HEADLINES (EVENING)

- PWD Minister Pu Vanlalhlana leh PWD department hotuten Aizawl khawpui chhung kawngpui pengthuam thenkhat siam dan tur rawtna Chief Minister hnenah an thlen.
- Mizoram Universal HealthCare Scheme zawmtu damdawiin ten chat lak lova sum an hmuh theih nan Finance Department in sum a pechhuak hma thin dawn.
- Prime Minister Narendra Modi-a’n India mite thisen ti luang tu mifirfiakte tan bihrukna hmun him a awmlo tih a sawi.
- US President rawtna anga Israel leh Iran-in inkah hai puang tawh mahse Israel-in inkahhaina thuthlung bawhchhiaah Iran a puh.



CM

PWD Minister Pu Vanlalhlana leh PWD department hotuten Aizawl khawpui chhung kawngpui pengthuam thenkhat siam dan tur rawtna Chief Minister Pu Lalduhoma hnenah an thlen.

PWD Minister Pu Vanlalhlana chuan, sum seng tam lutuk lo va pengthuam pawimawh pathum siam that tumna an neih thu a sawi a ni.

Rawtnaah pakhatna an ruahmanaah chuan State Guest House thlanga Chaltlang Road hnuaiah Ramhlun main Road leh Ramhlun lower road te tunnel siam a, lei hnuaia inzawm tir a, Bawngkawn Police Station bulah National Highway va zawmtir a ni a. Ramhlun lam atanga NH lama kal duh te tan leh NH atanga Ramhlun main road leh lower road-a kal tur te tan tuna traffic point va thleng kher lo va kaltir theih tum a ni a. He project hi cheng vbc 25 a thawh theih tura ruahman a ni.

An ruahmanna dang leh chu, Bawngkawn Hrangbana Filling Station thlang, tipper dinna atanga leihlawn, Brigade veng lama va dawhkai a ni a. Serchhip Bypass road, Sailiamkawn bula an dawh leihlawn ang chiah chu he hmunah hian Metre 49 vela sang, metre 150 a sei a dawh theih nia ngaih a nih thu tarlan a ni a. Lei dawh awlsam leh man tlawm a nih thu tarlangin Brigade veng lamah chuan Greenwood Hospital bul peng thuam velah a chhuak phei ang a. He hna hi vbc 30 vela thawh theih tura ngaih a nih thu tarlan a ni. Bawngkawn pengthuam hi Aizawl khawpui chhunga pengthuam lun ber a ni a. Chawhrualin nitin lirthei singnga chuangin an paltlang thin.

Ruahmanna pathumna chu Vaivakawn pengthuam siam a ni a. Vaivakawn junction ruahmanna hi tuna Vaivakawn Bazar sak mai tawh tur nen hian kal kawptir a ngai dawn tih sawiin PWD hotute chuan Cultural Centre bul hnai atanga YMA ground sir deuh chung a leihlawn, Bazar atana hman theih nghal tur dawh pheih a, Vaivakawn Bazar-a va innghahtir a ni an ti a. Cheng vbc 40 vela sak theih beisei a nih thu an sawi a. Vaivakawn pengthuam hi chawhrualin nitin lirthei singthum chuangin an paltlang thin a ni. Heng ruahmanna thawhna sum hmuhna tur hi la dap leh tur a nih thu tarlan a ni.

<><><>

SAMVIDHAAN HATYA DIWAS

Sorkar laipui ruahmanin naktuk khian rampumah India ram danpui, Constitution palzut ni champhaphak Samvidhaan Hatya Diwas hman a ni dawn.

Sorkar laipui chuan nikum khan June ni 25 chu Samvidhan Hatya Diwas atana hman turin a puang a. He ni hi kum 1975, June ni 25 a India ram sorkarin Emergency a puan hmanga India ram a tih chhiat hriatrengna atana tih a ni a. Kum 1975 Emergency puan laia nunna chan leh mi tam tak tuarna hriatpuina niah hman a ni dawn a ni.

Akashvani News in Govt. Mizoram Law College Assistant Professor P. Lalremruati a kawmna ah Ramchhunga Emergency puanin a nghawng pawl tak, khua leh tui zawng zawng ten an tuar theih chu an dikna chanvo Fundamental Rights tihtawp a ni a ti a, June ni 25, 1975-a Pi Indira Gandhi rorelna hnuaiah National Emergency puan a nih thu a sawi.

P. Lalremruati chuan he ni hi India danpui tihhlumna ni -Constitution Murder Day tih hial te pawha sawi a nih thu sawiin Pi Indira Gandhi in National Emergency a puan chuan ramchhung rorelnaa buaina a thlen thu a sawi a, a hunlaiin chanchibumite thlenga an dikna chanvo tihtawp a nih thu sawiin khua leh tuite zawng zawng dikna chanvo tihtawp chu a nghawng pawl ber zinga mi a nih thu a sawi a ni.

<><><>

MUHCS

Mizoram Universal HealthCare Scheme (MUHCS) zawmtu damdawiin ten chat lak lova sum an hmuh theih nan Finance Department in sum a pechhuak hma thin dawn.

Vawiina sorkar thuchhuah tarlan danin, Finance Department Office Memorandum in a chhuah a. Thla thum – sorkar Quarter khat ral hma in Mizoram State Health Care Society in sum hmanral tur a chhut zat ang a sanction thin dawn a ni.

Kan corr thudawn danin, tun dinhmunah Mizoram chhunga Private damdawiin za zela 40.62 in Mizoram Universal Health Care Scheme hi an zawm tawh a. MUHCS hotute sawi danin vawiin thleng khan Mizoram chhunga Private damdawiin 13 ten Mizoram Universal Health Care Scheme an zawm tawh a, hei hi za zela 40.62 niin a bak private damdawiin dang nen hian inbiakna kalpui mek a ni.

MUHCS hotute chuan Private damdawiin thenkhat scheme la zawm lo te chu mipuiten harsatna an tawh mek hrethiam a, MUHCS hnuaia mipui tana inziak lut turin an ngen a, tun dinhmunah Mizoram chhunga damdawiin 13 ah MUHCS hman theih niin Aizawl ah 6, Lunglei, Champhai leh Lawngtlai ah 2 theuh bakah Siaha ah pakhat inziak lut an awm a ni.



NASHA MUKHT BHARAT

Excise Commissioner Pu Z. Lalhmangaiha chuan Mizoramah ruihhlo a hluar chhan ber chu state thenawma Golden Triangle atanga Mizorama awlsam taka ruihhlo a luh vang a ni a ti.

Vawiina Akashvani News in a kawmnaah he thu hi sawiin Excise Commissioner chuan golden triangle chu nikumah pawh khawvela heroin tharchhuak hnem ber an nih thu a sawi a. Chumi atang chuan khawvel hmun hrang hrangah putdarh a ni a ti a. Mizoram chu Myanmar nena ramri km 510 nei a nih avangin khawi hmunah pawh, sakawr leh bawng hmang tein an rawn lut thei si a, hei hi Mizoram harsatna ber a ni a ti.

A do dan kawngah chi hrang hrangin theihtawp chhuah a nih thu a sawi a, Kohhran, sorkar leh NGO te pawhin theihtawp an chhuah a. An ni chauhin an do hneh theih loh avangin mipuite tanrual a ngaih thu a sawi a ni. Tih tak zeta ruihhlo chu mipui, a te ber atanga a lian ber te'n an do a ngaih thu a sawi a. Ruihhlo do kawngah tha thlah a nih chuan Mizoram dinhmun a thim hle dawn a ni a ti.

Byte of Z. Lalhmangaiha...

Excise & Narcotics department chuan kuminah May ni 31 thleng khan heroin kg 16 leh gram 171 bakah zu leh ruihna chi hrang hrang man a ni tawh a. ND&PS Act, 1985 hnuaiah mi 409 man a nih tawh thu leh case 214 ziahluh a ni tawh a. MLP Act 2019 hnuaiah mi 2,422 man a ni a, case 2,715 ziahluh a ni tawh bawk.

Hetihlai hian, sorkar hmalaknaa Ruihhlo ngai leh awmna hmun neilote lo enkawl lailawkna Hulhliap (short stay) chu nimin atang khan kalpui tan a ni a, mi 200 admit an ni.

Hulhliap Short Stay hi nimin khan Batch khatna bultan niin mi 150 admit tum an nih laiin mamawhna avangin mi 200 chuang admit an ni a, Social Welfare Minister Pi Lalrinpuui chuan Kohhran leh Tlawmngai pawl te chungah lawmthu sawiin Hulhliap Short Stay Centre chuan ruihhlo Bawih a tang mek te tan nunthar an neih theihna hmun anih ngei theihna turin tawngtaina lamah hriatzui a pawimawh a ti a, a hlawhtlin ngei theihna turin tan la tlang zel turin kalkhawm te a sawm bawk a ni.

Minister sawi danin he hmunah hian ni 10 chhung detoxing an ti ang a, ni 5 chhung Psychological counselling an neihpui ang. Ni 5 dang Synod revival camping center-ah an lut ang a, chumi zawhah chuan mahni in lama haw duhte chu hawn tir an nih dawn bakah Centre a awm duhte chu an awm zuina tur ngaihtuah sak an ni dawn a ni.



CHILD RIGHTS COMMISSION

Mizoram State Commission for Protection of Child Rights Chairperson Pu Jimmy Laltnanmawia'n tunhnaia naupang khawih chhetu Lalrampana leh midang hetiang a inhnawnawih ten an phu tawh hremna hmu ngei se an duh tih a sawi.

MSCPCR Chairperson chuan tunhnaia naupang kumtlinglo khawihchhiaa, midang hmuh theih tura hursualna video bawlhhlawh siam nana naupang inhnawnawih tir tu leh pholangtu Lalrampana chu CBI ten tun thla ni 9 khan an rawn man thu leh he thilthleng hi Commission chuan pawl an ti takzet tih a sawi a. POCSO Act chuan naupang laka hursualna leh zahmawh rawngkai lanna video leh thlalak reng reng, mimal kawltat tur a ni emaw, midang hmuha pho lan tur a ni emaw a khap tlat tih sawiin Dan bawhchhetu chu kum-5 aia tlem lo Lung-In tan tir leh sum chawitir thlengin a huam thu leh, a tusual nawn tu chu kum-7 thleng tang tura hrem theih a nih thu a sawi bawh a ni.

Byte of Jimmy Laltnanmawia...

MSCPCR hotute chuan tunah hian POCSO Act hnuaiah Mizoram chhunga district court hrang hrangah case kal lai 194 a awm mek thu an sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

PM AFFIRMS

Prime Minister Narendra Modi-a'n India mite thisen ti baw tu mifirfiakte tan bihrukna hmun him khawiahmah a awmlo tih sawiin Operation Sindoor chu khawvel hriata India chak zia leh a firfiaka chetna a palzam loh zia tarlangtu a ni, a ti.

He thu hi India ram hruiatu ropui 2, Sree Narayana Guru leh Mahatma Gandhi-ten inbiakna chhinchhiah tlak tak an neih kum 100 tlin lawmna, New Delhi-a neih a hmanpuinaah sawiin India chuan ram pum thatna ber turin thu tlukna a siam thin a, sipai lama ramdang tanpuina a mamawh tlem tial tial a ti a, defence sector-ah pawh India chu a intodelh tawh hle tih sawiin Operation Sindoor thlak lai pawh khan ramchhung siam ralthuam hmangin hmelmate chu minute 22 chhung lekin inpe lo thei lo dinhmunah a din tir thei a ni, a ti.

<><><>

ISRAEL-IRAN CEASEFIRE

US President Donald Trump-a'n Israel leh Iran inkarah inkahhai puang tawh mahse Israel Defence Forces (IDF) chuan Iran-in missile a la kap chhuak zui zel niin

an sawi a, Iran atanga ballistic missile kah chhuah zui zel anih avangin Israel hmar lamah inralrinna dar, siren tih rik a ni, a ti. Hetih lai hian Iran chuan Israel puhna chu pha-in inkahhai puan hnuah missile kah chhuah an nei lo niin a sawi a ni.

Hemi hma lam hian Iran nena inkahhai nei tura US President Donald Trump-a rawtna chu Israel-in a pawm a, Prime Minister Benjamin Netanyahu-a office atanga thuchhuah sawi danin an tum ber, Tehran-a nuclear leh ballistic missile siamna hmunte an tihchhiat tawh avangin inkahhai neih an remti a, an thil tum tihhlawhtlinna kawnga Israel thlawptu leh puitu United States chungah lawmthu an sawi a, inkahhai bawhchhiatna a awm anih chuan Israel-in na takin a chhang let nghal dawn tih thuchhuahah chuan a tarlang bawk.

<><><>